

Kerajaan tetap teruskan dasar bawa pembangunan

BH 16 JUL 2002

PENDANG, Isnin – Datuk Seri Dr Mahathir Mohamad berkafah kerajaan tetap meneruskan dasarnya untuk membawa pembangunan ke kawasan luar bandar dalam usaha menyeimbangkannya dengan kepesatan kemajuan bandar.

Perdana Menteri berkata, dengan dasar seimbang itu juga kerajaan Barisan Nasional (BN) berjaya mengurangkan kadar kemiskinan dengan drastik iaitu daripada lebih 80 peratus 44 tahun lalu kepada hanya tujuh peratus sekarang.

Malah, katanya, kerajaan turut memperkenalkan Program Pembangunan Rakyat Termiskin (PPRT), untuk membina lebih banyak rumah, jalan raya dan prasarana lain untuk kepentingan rakyat miskin.

“Jika kita (BN) dipilih semula, kita akan terus menolong rakyat,” katanya ketika merasmikan perayaan Hari Peladang,

Penternak dan Nelayan peringkat negeri bertemakan ‘Transformasi Pertanian Melalui Teknologi’ di Taman Rekreasi Pendang di sini, hari ini.

Pada majlis sama, 150 bekas ahli Pas menyerahkan borang permohonan menyertai Umno kepada Dr Mahathir.

Dalam ucapannya, Perdana Menteri turut menegur sikap setengah rakyat yang tidak tahu erti berterima kasih dan menghargai segala usaha pembangunan yang dibawa oleh kerajaan sehingga ramai anak petani dan nelayan berjaya melanjutkan pelajaran ke peringkat tertinggi.

Dr Mahathir berkata, sebaliknya Pas mengajar rakyat tidak perlu berterima kasih dan cuma bersyukur kepada Tuhan saja, tetapi tindak-tanduk parti pembangkang itu tidak sejajar dengan kehendak Islam.

Katanya, jasa kerajaan BN perlu dibalas dengan memberi

undi kepada calon BN, Datuk Othman Abdul yang bertanding bagi kerusi Parlimen Pendang dan Datuk Zakaria Said di Dewan Undangan Negeri (DUN) Anak Bukit.

Dr Mahathir berkata, kawasan Pendang yang pernah diwakilinya apabila memenangi kerusi itu atas nama Kota Setar Selatan pada 1964, kini sudah pesat membangun dengan ada jalan raya serta kemudahan lain.

“Kerajaan BN merancang pembangunan dengan baik, tetapi Pas cuma tahu memberi ucapan, memaki hamun orang lain dengan cuba membangkitkan perasaan benci rakyat kepada kerajaan.

“Mereka menggelar saya Firaun, mahazalim. Firaun letak jawatan, Firaun nak pencen. Awatlah Pas buat macam ini, teruk saya. Kalau kata saya (kelihatan) hodoh tak apa, tetapi ini panggil saya macam-macam,” katanya.